

# Tarnikkut nappaatilinnut immikkoortortaqarfimmi nammineersinnaajunnaarsitsinermit allaasumik pinngitsaaliisummik iliuuseqarneq pillugu Namminersorlutik Oqartussat nalunaarutaat

Tarnimikkut napparsimasunik nammineersinnaajunnaarsitsisarneq allatigullu pinngitsaaliisummik iliuuseqartarneq pillugu Inatsisartut Inatsisaanni nr. 11, 12. juni 2019-imeersumi § 14, imm. 7, § 15, imm. 3, § 20 kiisalu § 31 naapertorlugit aalajangersarneqarput:

## Kapitali 1

### *Pinngitsaaliisummik katsorsaanerit*

### *Pinngitsaaliisummik nakorsaasiinerit*

§ 1. Katsorsaariaatsit allat atorsinnaanngitsutut nalilerneqarpata aatsaat pinngitsaaliisummik nakorsaasiisoqarsinnaavoq.

§ 2. Nakorsaasiinnginnerup kingunerisaanik napparsimasup inuunera peqqissusaataluunniit navianartorsiortinneqarnera eqqaassanngikkaanni, nakorsaasiinissap pisariaqassusaanik napparsimasup nassuiaattuaraluarnera sunniuteqanngippat, pinngitsaaliisummik nakorsaasiisoqarsinnaavoq.

*Imm. 2.* Nakorsaanerup eqqarsarfissinneqarnerup sivilissusissaanik naliliinermini ilaatigut nappaatip navianaateqarnera sivilissusaalu, napparsimasup katsorsarneqarnissamut neqoroortutigneqartumut imminnut assortuuttunik isumaqarnera, nakorsaaserneqannginnerup allatigut pinngitsaaliinikkut iliuuseqartoqartariaqalerneranik kinguneqarsinnaanera napparsimasullu qanoq naalliuuteqartiginera pingaartissavai.

*Imm. 3.* Nakorsaanerup pinngitsaaliisummik nakorsaasiinissaq pillugu aalajangiinnginnerani, napparsimasup apeqqu taanna pillugu napparsimasunut siunnersortiminik oqaloqateqarnissamut periarfissinneqarsimassaaq.

*Imm. 4.* Eqqarsarfissinneqarnermi napparsimasooq ullut tamakkiallugit nammineq piumassutsi naapertorlugu nakorsaasiinissamik neqeroorfigineqassaaq, kajumissaariniarnerlu allattugaatinut nalunaarsorneqassalluni.

*Imm. 5.* Navianaatillit imm. 1-imi taaneqartut eqqaassanngikkaanni, pinngitsaaliisummik nakorsaasiinissamut napparsimasup siunnersortaatalu nakorsaasiinerup siunertaanik, sunniutaanik kingunerluutigisinnaasaanillu tamakkiisumik paasitinneqarsimanissaat piumasaqaataavoq.

§ 3. Pinngitsaaliissummik nakorsaasiinermi kingunerluutaasinnaasut nakkutigeqqissaarneqassapput paasineqarniariarpatalu sapinngisamik ajunnginnerpaaq anguniarlugu akiorniarneqassallutik. Tamatumunnga atatillugu pinngitsaaliissummik nakorsaasiinerup taama annertutigiinnarnissaa eqqarsaatigeqqissaartariaqarpoq.

*Imm. 2. Annertuallaartumik nakorsaasiisoqassanngilaq.*

§ 4. Nakorsaatit sivisuumik sunniusimasartut sapinngisamik atornaveersaarneqassapput, nakorsaatillu napparsimasumut qanoq sunniuteqarnerat ilisimasaqarfiginngikkaanni napparsimasunik pinngitsaaliissummik nakorsaaseeqqaarnissami atorineqassanatik.

§ 5. Pinngitsaaliissummik nakorsaasiinerni tamatigut nakorsamik najuuttoqartassaaq.

#### *Pinngitsaaliissummik nerisitsineq*

§ 6. Tarnimikkut napparsimasunik nammineersinnaajunnaarsitsisarneq allatigullu pinngitsaaliissummik iliuuseqartarneq pillugit Inatsisartut inatsisaanni § 11-imi piumasaqaatit napparsimasumit eqquutsinneqarpata napparsimasullu inuunerata annaanneqarnissaanut taamaasiornissaq pisariaqarpat imaluunniit taamaasiunnginneq napparsimasup inuuneranut peqqissusaanulluunniit annertuumik navianartorsiortitsissappat, aatsaat pinngitsaaliissummik nerisitsisoqarsinnaavoq.

#### *Timikkut nappaammut pinngitsaaliissummik nakorsarneqarneq*

§ 7. Timikkut nappaatilinnut immikkoortorta qarfimmiinnermi pinngitsaaliissummik iliuuseqartoqartariaqalerpat, nammineersinnaajunnaarsitsineq allatigullu pinngitsaaliineq pillugit Inatsisartut inatsisaat naapertorlugu, nakorsaanerup tarnikkut nappaatinut immikkut ilisimasallip nakorsaanerullu timikkut nappaatinut pineqartunut immikkoortorta qarfimmeersup aalajangiinera tunngavigalugu aatsaat pisinnaavoq.

*Imm. 2. Imm. 1 naapertorlugu pinngitsaaliissummik iliuuseqarneq, tarnimikkut nappaatilinnut immikkoortorta qarfimmi peqqissaanermik suliallannit timikkullu nappaatinut pineqartunut immikkoortorta qarfimmi peqqissaanermik suliallannit ikioqatigiinnikkut isumagineqassaaq.*

§ 8. Napparsimasup qanoq innera timikkullu nakorsarneqarnera apeqqutaatillugu, nakorsaanerup tarnikkut nappaatinut immikkut ilisimasallip timikkullu nappaatinut pineqartunut immikkoortorta qarfimmi nakorsaanerit isumaqatigiinnerisigut, napparsimasooq tarnimikkut nappaatilinnut immikkoortorta qarfimmuut nuutsinneqassaaq.

#### *Naammagittaalliorneq*

§ 9. Pinngitsaaliissummik iliuuseqarnissamik aalajangiineq pillugu naammagittaalliuuteqarneq kinguartitsinermik kinguneqartarpoq, napparsimasup inuuneranut peqqissusaanullu annertuumik

navianartorsiortitsinera pissutigalugu, imaluunniit napparsimasoq allanik timikkut peqqissutsikkullu annertuumik navialisitseqqunagu ingerlaannaq iliuuseqarnissaq pisariaqavissunngippat.

## Kapitali 2

### *Angerlartitaareermermi pinngitsaaliisummik malittarineqarneq*

**§ 10.** Tarnimikkut napparsimasunik nammineersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut inatsisaanni § 19 naapertorlugu piumasaqaatinik naammassinninnikkut taamaallaat angerlartitaareermermi pinngitsaaliisummik malittarinnittoqarsinnaavoq.

*Imm. 2.* Angerlartitaareermermi pinngitsaaliisummik malittarineqarnissaq pillugu nakorsaanerup aalajangiinerani nakorsartinnissaq siunertaralugu peqqinnissaqarfimmut, tassunga ilanngullugu najukkami tarnimikkut nappaatilinnik sullissivimmut, ornigunnissamik peqqusummik taamaallaat imaqaassaaq.

*Imm. 3.* Unitsitsineq pineqartoq sioqqullugu tassungalu atatillugu napparsimasup angerlareermermini pisariaqartumik nakorsarneqarnermik taamaatitsinissaanut ilimaginninnermut pissutsit suut tungavilersuutaanersut, nakorsartinnerullu taamaatinneqarnera napparsimasup peqqissusaanut qanoq kinguneqassanersoq, napparsimasut pillugit allattugaatinut nalunaarsorneqassapput.

*Imm. 4.* Peqqinnissaqarfiup immikkoortuisa ilaannut napparsimasoq unitsinneqarluni pinngitsaaliisummik nakorsarneqartariaqarpat, qanoq annertutigisumik pinngitsaaliinnikkut nakorsaasiisoqarsinnaanera katsorsarneqarnissamut pilersaarummi allassimassaaq.

**§ 11.** Tarnimikkut napparsimasunik nammineersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut inatsisaanni § 5-imi malittarisassat malillugit angerlartitaareermerup kingorna pinngitsaaliisummik malittarinninnermut atatillugu nakorsaasiineq pissaaq.

*Imm. 2.* Nakorsaasiineq atorneqartoq, tassunga ilanngullugit sivisuumik sunniusimasartuusinnaasut, sunniutaat ilisimaneqartumik napparsimasumut iluaqutaassapput.

*Imm. 3.* Angerlartitaareermermi pinngitsaaliisummik malittarineqarnermi nakorsarneqarnerup, napparsimasup peqqissusaanut pitsaasumik sunniuteqarnerata annertuallaanillu kingunerluuteqannginnerata qulakkeernissaa Dronning Ingridip Napparsimmavissuani tarnimikkut nappaatilinnut immikkoortortaqaarfimmi nakorsaanerup akisussaaffigaa.

**§ 12.** Napparsimasoq nakorsaaserneqarnissaq siunertaralugu aggerfissatut isumaqatigiissutaasut naapertorlugit takkutinngippat, Dronning Ingridip Napparsimmavissuani tarnimikkut nappaatilinnut immikkoortortaqaarfimmi nakorsaanerup politiit ikiorsiullugit napparsimasup peqqinnissaqarfiup immikkoortortaanut pineqartumut pinngitsaaliisummik nakorsartikkiartortinnissaa aalajangiivigisinnaavaa.

*Imm. 2.* Politiinut attaveqartinnani napparsimasumut naammaginartumik attaveqarniartoqarsimanera qulakkeerneqassaaq.

*Imm. 3.* Sapinngisaq tamaat piaartumik piffissaalluarallartillugulu politiinit ikiorserneqarnissamik qinnuteqartoqassaaq, napparsimasorlu aaneqartussaq pillugu sukumiisunik paasissutissiisoqassalluni.

*Imm. 4.* Tarnimikkut napparsimasunik nammineersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut inatsisaanni § 5, imm. 3, naapertorlugu

napparsimasunik aallerneq angallassinertu pisariaqanngitsunik kanngutsatsitsisoqaqunagu ajoqutitaqaqunaguluunniit, sapinngisaq tamaat qajassuartumik malunnaarsaartumillu ingerlanneqassaaq. Politiit peqataasut sapinngisaq naapertorlugu inuinnartut atisaqassapput. Napparsimasooq politiit biiliinut ilaatinneqassappat sapinngisaq tamaat inuinnaat biilii suliffimmi atornerqartartut atorlugit ingerlanneqassaaq.

*Imm. 5.* Tarnimikkut napparsimasunik nammineersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut Inatsisaanni § 19, imm. 3, oqaaseqatigiit aappaat, naapertorlugu peqqinnissakkut sullissisoq politiit aallerneranni sapinngisamik peqataasussaq, ajornanngippat napparsimasumit ilisarisimaneqassaaq, napparsimasorlu nakorsartissimanera ilanngullugu, ilisimasaqarfigissallugu.

*Imm. 6.* Napparsimasup aaneqarnermut pinngitsaaliisummillu nakorsaaserneqarnermut akiuunnera, napparsimasup nakorsartinneranut periarfissaanullu kinguneqartinneqartariaqanngilaq. Aallernermi pinngitsaaliillunilu nakorsaasiinermi napparsimasup qisuariaataanik immikkut ittumik paasinninnermik takutitsisoqartariaqarpoq.

**§ 13.** Tarnimikkut napparsimasunik nammineersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut inatsisaanni § 19, imm. 6, naapertorlugu Dronning Ingridip Napparsimmavissuani tarnimikkut nappaatilinnut immikkoortortaqaqfimmi nakorsaanerup napparsimmavimmit angerlareernermi pinngitsaaliisummik malittarinninnerup qaammatit pingasut pallillugit sivitsornissaa aalajangiuppagu, napparsimasooq piffissaalluarallartillugu kingusinnerpaamillu piffissaliussatut aalajangiussami malittarinninnerup naammassinnissaa sap. ak. ataatsimik sioqqullugu ilisimatinneqassaaq.

*Imm. 2.* Piffissami aalajangiussami malittarineqarnermut atatillugu kingusinnerpaamik nakorsaasiinissamut kingullermut ornigunnerani nakorsaanerup napparsimasooq oqaatsitigut allakkatigullu sivitsuinissaq pillugu ilisimatissavaa.

**§ 14.** Angerlartitaareernerup kingorna pinngitsaaliisummik malittarineqarnissamik aalajangiussamut naammagittaalliuteqarneq kinguartitsinermik kinguneqassaaq.

*Imm. 2.* Tarnimikkut napparsimasunik nammineersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut inatsisaanni § 19, imm. 3, aamma imm. 6, naapertorlugit politiit aaneqarnissap angerlartitaareernermilu pinngitsaaliisummik malittarineqarnissap sivitsornissaanik nakorsaanerup aalajangiinera pillugu naammagittaalliorneq kinguartitsinermik kinguneqarneq ajorpoq.

### **Kapitali 3**

*Pinngitsaaliisummik aalaakkiineq nukinnillu atuineq*

*Pinngitsaaliisummik aalaakkiineq*

**§ 15.** Tarnimikkut napparsimasunik nammineersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut inatsisaanni § 21, imm. 2 naapertorlugu pinngitsaaliilluni aalaakkiineq oqaatigineqartutut taamaallaat atornerqarsinnaavoq.

*Imm. 2.* Nakorsap inassuteqaataanut napparsimasup massakkut qanoq innera tunngavigalugu pinngitsaaliisummik aalaakkiinissap pisariaqassusaanik nakorsap naliliinera allatullu iliuuseqarsinnaanerup, soorlu nakkutilliinerulernerup naammannginnerata imaluunniit naammassineqarsinnaannginnerata paasineqarsimanissaa piumasaqaataavoq.

*Imm. 3.* Qitequserlugu aalaakkiinerup saniatigut assannut isikkanullu parnaarsaatit aamma aaqqatit tarnimikkut napparsimasunik nammineersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut inatsisaanni § 22, imm. 2 naapertorlugu atorneqassanersut aalajangiiffineqassaaq.

*Imm. 4.* Tarnimikkut napparsimasunik nammineersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut inatsisaanni § 6 naapertorlugu imm. 3-mi taaneqartut malillugit nakorsap peqannginnerani aalajangiinerit aalajangerneqassapput.

**§ 16.** Napparsimasoq qiteruserlugu aalaakkigaq aalajangersimasumik paarsisoqassaaq.

*Imm. 2.* Aalajangersimasumik paarsisuusinnaavoq peqqissaasoq, peqqissaanermik sulialik imaluunniit allamik naapertuuttumik ilinniagalik allanik suliaqarani taamaallaat qiteruserlugit aalaakkikkanik suliakkerneqartoq.

*Imm. 3.* Napparsimasup kissaataa, ataqqinassusaa imminullu naleqartinnera ataqqillugit nakkutilliisoqassaaq.

*Imm. 4.* Napparsimasumut tunngatillugu isumannaallisaanermut ajoqutaanngippat, nammineq inuttut inuuneqarnissamut pisinnaatitaaffeqassaaq.

**§ 17.** Pinngitsaaliisummik aalaakkiineq attatiinnarneqarpat, aalaakkiinissamik aalajangiinnermiit pinngitsaaliisummik qiterusiinikkut aalaakkiinerup ingerlatiinnarneqarnissaa pillugu apeqqut, pissutsit apeqqutaatillugit akulikitsunik minnerpaamilli ullup unnuallu ingerlanerani ataasiarluni nakorsamit naliliivigineqartassaaq. Nakorsap naliliinera allattugaatinut ilanngunneqassaaq.

*Imm. 2.* Peqqissaanermik suliallit pinngitsaaliisummik aalaakkiineq pisariaaruppat sukkulluunniit taamaatissinnaavaat.

**§ 18.** Napparsimasut namminneq toqqissisimanissartik siunertaralugu aalaakkerneqarnissamik kissaateqarnerat tunngavigalugu aalaakkiineq nakorsamit akuerineqarnikkut aatsaat pisinnaavoq.

*Imm. 2.* Napparsimasut imm. 1 naapertorlugu aalaakkikkat aalajangersimasumik nakkutilliisoqarnissamik neqeroorfigineqassapput.

*Imm. 3.* Qinnuteqaat aalaakkiisimanerlu napparsimasumut tunngatillugu allattugaatinut pinngitsaaliisummillu iliuuseqarnernut nalunaarsuivinnut nalunaarneqassapput.

## **Kapitali 4**

### *Napparsimasoq illersorniarlugu aalaakkiineq*

**§ 19.** Napparsimasoq illersorniarlugu aalaakkiinissaq sioqqullugu, napparsimasumik takuniaareernermi nakorsaq tamatuminnga inassuteqaqqaassaaq.

*Imm. 2.* Nakorsap napparsimasumik illersuiniarluni aalaakkiinissamut inassuteqaataani, napparsimasumik illersuiniarluni aalaakkiutip suup qanoq annertutigisumik qanorlu pisoqarnerani atorneqarnissaa

taaneqassaaq.

*Imm. 3.* Napparsimasumik illersuiniarluni aalaakkiinissanik inassuteqaataasunik aqutsinerit ataasiakkaat ingerlanneqarnissaat paaqqutarinninnermik sulialinnut isumagittinneqarsinnaavoq.

**§ 20.** Napparsimasoq illersorniarlugu aalaakkiissutitut ilaapput qitequtit assigisaalluunniit napparsimasup siniffimminit issiavimminilluunniit nakkarluni imaluunniit paatsiveerusimaarluni angalanermini ajoqusernissaa pinaveersaartinniarlugu qajassuartumik atorneqartartut.

*Imm. 2.* Illersuiniarnermi siunertamut suut tulluarnernerannik napparsimasumullu suup iluarinarnerussaneranik naliliineq tunngavigalugu suup illersuutitut atorneqarnissaa aalajangiivigineqassaaq.

#### *Pinngitsoorani naliliisarneq*

**§ 21.** Napparsimasumik illersuiniarluni aalaakkiinerup napparsimasumut isumannaatsuunera eqqarsaatigalugu, pisariaqartitsinermit annertunerusumik atorneqannginnissaa inassuteqaatillu tamatuma allanngortinneqarsinnaanerata, periarfissaqarnerit tamaasa apeqquserneqartarnissaa, nakorsat peqqissaanermillu suliallit nakkutigisassaraat.

### **Kapitali 5**

#### *Inummik immikkut nakkutiginninneq aamma immikkoortortaqaqfimmi matunik parnaarsuineq*

#### *Immikkut nakkutiginninneq*

**§ 22.** Tarnimikkut napparsimasunik nammineersinnaajunnaarsitsisarneq allatigullu pinngitsaaliissummik iliuuseqartarneq pillugit Inatsisartut inatsisaanni § 27, imm.1 naapertorlugu immikkut nakkutiginninnermik atuineri nalunaarummi tassani aalajangersaanerit imatut paasineqassapput, napparsimasoq sulit nakkutigineqartoq, tassunga ilanngullugit uffarnermi perusersariartornermilu taamaalillunilu sulisut pinasuartumik akulerunnissaminut periarfissallutik.

*Imm. 2.* Napparsimasumik immikkut nakkutilliinissaa nakorsap napparsimasumik misissuereernermini aalajangiivigissavaa. Aalajangiineq pinngitsaaliinerit pillugit allattugaatinut aammattaaq napparsimasumut tunngatillugu allattugaatinut nalunaarneqassapput.

#### *Immikkoortortaqaqfimmi matunik parnaarsuineq*

**§ 23.** Immikkoortortaqaqfimmi matunik parnaarsuinissaa pillugu nakorsaq aalajangiissaaq.

*Imm. 2.* Napparsimasut immikkoortortaqaqfimmi matunik parnaarsuineri aalajangiinnermut attuumassuteqanngitsut, immikkoortortaqaqfimmi sulisunut saaffiginninnikkut sapinngisaa tamaat kissaataappallu immikkoortortaqaqfimit anisinnaanermik ingerlaannaq neqeroorfigineqassapput.

*Imm. 3.* Matunik parnaarsinissaa aalajangiunneqariarpat imm. 2-mi aalajangersagaq naapertorlugu, tassunga ilanngullugu immikkoortortaqaqfimit aninissamut periarfissaaq ilanngullugu, immikkoortortaqaqfimmi napparsimasut tamarmik kalerrinneqassapput.

## Kapitali 6

### *Pinngitsaaliisummik timikkut eqqiluisaartitsineq*

**§ 24.** Tarnimikkut napparsimasunik nammineersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut inatsisaanni § 30-mik atuinermi inuttut eqqiluisaarnerit assersuutigalugu tassaasinnaapput, uffarnerit, qulinnerit, kigutigissarnerit, nanginik nalequttanillu taarsiinerit, assersuutigalugu napparsimasunut puigortunngorsimasunut, errortanik atisalersornerit il.il. Tamatumunnga nakorsaanerup aalajangiinera napparsimasut nalunaarsorneqartarfiannut ilanngunneqassaaq.

*Imm. 2.* Nakorsaanerup aalajangiinera tunngavilersuineralu imm. 1 malillugu napparsimasut nalunaarsorneqartarfiannut ilanngunneqassaaq.

*Imm. 3.* Pinngitsaaliisummik eqqiluisaartitsinerit pillugit maalaarutaasinnaasut napparsimmavimmi oqartussanut saaffiginnissutaassapput.

## Kapitali 7

### *Atuutilersitsinermit atorunnaarsitsinermullu aalajangersakkat*

**§ 25.** Nalunaarut 26. april 2024-mi atuutilerpoq.

*Imm. 2.* Tamatuma peqatigisaanik Tarnimikkut nappaatilinnut immikkoortortaqarfimmi nammineersinnaajunnaarsitsinermit allaanerumik pinngitsaaliisummik iliuuseqarneq pillugu Namminersorlutik Oqartussat nalunaarutaat nr. 20, 2. december 2013-meersoq atorunnaarsinneqarpoq.

*Namminersorlutik Oqartussat, ulloq 23. april 2024*

**Agathe Fontain (atsior.)**

Peqqissutsimut Naalakkersuisoq

/ Nike Berthelsen (atsior.)

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut